



partii naleraq

UKA2015/112
11.nov 2015

Savaatillit nersutaatillillu inuussutissarsiuteqarnerannut nanoqartalenera qanoq annertutigisumik ajornartorsiutaalersimanera, tamatumanilu tamatuma qanoq iliuuseqarfigineqarsinnaanera pillugu Naalakkersuisut misissuisitsissasut Inatsisartut aalajangiiffigisassaattut siunnersuut.

(Inatsisartunut ilaasortaq Aqqaluaq B. Egede, Inuit ataqatigiit)

Inatsisartunut ilaasortaq Aqqaluaq B Egede Inuit ataqatigiit savaatillit nersutaatillillu inuussutissarsiuteqartut eqqarsaatigalugit nannut pillugit misissuisitsisoqarnissaa pillugu aalajangiiffigisassatut siunnersuuteqarluni.

Nanoq uumasuuvoq qaasuttoq inuit akornanni, kiisalu savaatillit uumasuutillillu najugaanni asuli uumasutigineqarsinnaanngitsoq, ukiunimi makkunani nannut inoqarfinnut takkukkiartuinnarnerat malunnarsiartuinnarmat soorunami tamanna inoqarfinni najugalinnut toqqissisimanaarnaviangilaq. Nanormi qaasuttoq inuit akornanni uumasuutitut ilillugu angalaartinneqarsinnaanngimmat.

Nersutaatillit akornanni aamma ajornartorsiutaasarpat nanoq takkuppap toqunneqartariaqarpoq, inuit nersutaatillillu nersutillu uumasuutaat illersorniarlugit, tassami taamaaliortoqanngippat nersutaatillit inuillu akornanni ajornartorsiutinngortussaavoq, sumiiffimmiit sumiiffimmut nooqqattaaginnartussa.

Tassami misissuisoqarsinnaavoq kisianni suna misissorneqassagami? Nanoq uumatiinnarneqassasoq? imaluunniit ajortumik pisoqareerpat aatsaat toqunneqarsinnaasoq? nalunngilluinnarparput nanoq uumasooq qasuttusoq inuillu akornanni takkulluni ajormeerissagaluarpat nuanninngilluinnartussaavoq eqqorneqartunut uagutsinullu politikimi sulialinnut.

Meeqqat utoqqaat nanorlu eqqarsaatigissagaanni suna tulluarnera illersussallugit, Nanoq imaluunniit inuit? Partii Naleqqamiit ersarilluinnartumik oqaatigissavarput inuit salliutinneqartariaqartut, asuli nanoq uumasuutiginiarneqarsinnaanngilaq, navianartorsiortitippallu piartumik sumiiffinni takkuffiini toqunneqartariaqarpoq ajornerusumik pisoqannginnerani.

Ukiut arlalinngorput Tunumi inoqarfinni nannut takkukkiartuinnarnerat ajornartorsiutigineqariartuinnarluni, tamannalu innuttaasunut toqqissisimananngitsoq oqaatigineqattaarpoq, pingaartumik meeqqat eqqarsaatigalugit akuersaaruminaatsorujussuaq.

Taartalerpoq kaperlakkiartorlunilu assersuutigalugu Ittoqqoortormiini ajornartorsiut qiviassagaanni piumasaqataasoq oqaatigineqartarpoq nanoq ungoorlugu qimaatinniarneqartassasoq, Taartumi silarluttumi aqqusinermi nanoq naammattooraani takorloorsinnaavara qanoq ilungersunartigissasoq, tassami nerisassarsiorlutik inuit akornannut takkuttarmata, imanngitsoq asuli illut akornanni angalaartoq takusassarsiorluni. Taamaattumik inuit akornannut nannut pulasut toqunneqartariaqarput ajorluinnartumik pisoqannginnerani.

Kiisalu naalackersuisoqarfimmiit nannut inoqarfinnut ajornartorsiutaasut pillugit saaffiginnittoqartarmat Tunumi iliuusissatut oqaatigineqarpoq naanut qimaatinneqarsinnaasut igap matui kallussaatiinnarlugit.

Radiukkut tusarakku isumaqaleraluarpunga ukiup naanerani quujasaarisut tusarnaarlugit, tassalimi piviusorsiuunngingaarmat. Kisianili tamaat malinnaaffigigakku paasilerpara sunaaffa ilumoortumik periusissatut innersuussutigineqartoq.

Takorluulerpakka ernguttakka mikisut silamut anilerpata igap matuiniq tuneriarlugit oqarfigissagikka nannut ornilerpasi igap matui takuteriarlugit qallussaatinnarumaarpasi taava nanoq qimaassaaq. pissutsit tamakku atuutinniarneqartut akuersaarneqarsinnaanngivipput, nanormi kaattoq igap matuiniq unitsinneqarsinnaasoq takoorlorneqarsinnaanngivimmat.

Aqqaluaq B Egede aalajangiiffigisassatut siunnersuutaa taamatut oqaaseqarfigaarput ataatsimiititaliamilu suliarineqarnissaa innersuussutigalugu.

Hans Enoksen